

Lettres Patentes du

no. 12

Roy, confirmatives des precedentes, portant deffences à tous ses subjects, de porter clinquans, passements, broderies, porfil-leures, toilles, & autres estoifes d'or & d'ar-gent : comme aussi tous passements, cor-dons, neuds, & autres choses semblables, & generallyment tout ce qui est broderie & brodé, sur les peines y contenuës.

*Publiées au Parlement de Prouence, le
cinquiesme de Mars, 1620.*



A Aix, Par Iean Tholosan, Imprimeur du
Roy, & ordinaire de ladicte ville, 1620.



OVYS Par la grace de Dieu
Roy de France & de Navarre,
Comte de Prouëce, Forcalquier
& terres adjacentes. A tous ceux

qui ces presentes Lettres verront : Salut.
Bien souuent les desordres du siecle & des
causes qu'on n'a peu prevoir, font enfrain-
dre des loix qui iugées iustes en leur pro-
mulgation, estoient en l'observation, vtilles
au general & aux particuliers de l'Estat: tel-
les ordonnances ne doiuent iamais estre
censées, enfraintes, bien que par l'inobser-
uance & la necessité du temps, les contreue-
nans n'ayent esté punis, faute à la verité cō-
mise par la tollerance & par l'impunité que
le grand nombre des contreuenâs a plustost
obtenu qu'aucune autre raison, qui deust
estre considerable : mais cela ne doit em-
pescher le Prince qui est l'image de la vraye
sapiëce, preuoyant les maux qui s'en pour-
roient ensuiure, qu'il ne renouelle ses loix.
Et au contraire iugeant des choses non par
les effects que produisent les causes : mais
par la connoissance d'elles mesmes en leurs
propres origines qu'il ne preuienne ces in-

conueniens. Les deffences qui par tant de fois ont esté publiées de porter or, argent, en clinquans, passemens, porfileures, toilles & estoifes, broderie de soye, bandes de Milan, ou contrefaites sont de ce nombre. & la desobeïssance appuyee sur le seul luxe, ne peut ny ne doit estre tollerée. Et pource que de ce mal la necessité s'en ensuit par la ruyne qu'une folle despence apporte qui est suivie de plusieurs autres qui s'excusent sur elle mesme. Il est bien raisonnable de couper la racine à tant de maux, & ne se contenter de deffendre de nouveau les choses prohibées, ains y adjouster tout ce qui peut estre de mesme nature, & qui n'en est différente que par le nom qu'on luy impose. **POUR CES CAUSES** & autres à ce nous mouuans, de l'aduis de nostre Conseil où estoient les Princes de nostre sang, autres Princes, Ducs, Pairs, Officiers de nostre Couronne, & plusieurs des principaux d'iceluy, & de nostre certaine science, pleine puissance, & autorité Royale. **NOUS** auons dict & ordonné, disons & ordonnons par ces presentes signées de nostre main.

Vou

Voulons & nous plaist, que les deffences cy
 devant faiçtes sur le port desdits clinquans,
 passemens, broderies, porfileures, toilles &
 autres estoifes d'or & d'argent, broderies de
 soye, passemens de Milan contrefaiçts, soient
 de nouveau publiées & obseruées sur les
 peines y contenuës, Et afin que par moyens
 subtils & desguisemens nostre intention ne
 soit enfreinte. Nous auons aussi deffendu
 tous passemens, cordons, nœuds, & autres
 choses semblables qui seront cy apres cou-
 suës en forme de broderie, soye passée &
 poinçts nouëz, & generallyment tout ce qui
 est broderie & brode, Et bien que telle def-
 fence deust auoir lieu dès à present comme
 ja faiçte, si est-ce que le but pour lequel
 nous la renouuellons, estant pour euitier à la
 despence en laquelle se consomme nostre
 Noblesse. Nous leur auons permis d'vser
 les habillemens ja faiçts iusques au iour &
 Feste de Pasques, lequel iour passé. Nous
 voulons & ordonnons estre procedé contre
 les contreuenans, selon la teneur & rigueur
 de nos ordonnances. **SI DONNONS**
 en mandement à noz amez & feaux Con-

seillers les gens tenans noz Cours de Parlement, & à tous noz Baillifs, Seneschaux, Preuosts, Iuges, & autres noz Iusticiers & Officiers qu'il appartiendra, que ces presentes ils fassent lire, publier, & registrer par tous les lieux & endroicts de leurs ressorts, Iurisdicions, & destroicts, & icelles de point en point, entretenir, garder, & obseruer inuolablement. **C A R** tel est nostre plaisir. Et pource que de celsdites presentes l'on pourra auoir affaire en plusieurs & diuers lieux, Nous voulons qu'au vidimus d'icelles deuement collationné, foy soit adioustée comme au present original, auquel en tesmoing de ce, nous auons fait mettre nostre seel, Donne à Paris le huiſiesme iour de Feurier l'an de grace mil six cens vingt. Et de nostre regne le dixiesme.

Signé **L O V Y S.**

Et sur le reply, Par le Roy Comte de Prouence.

P H E L I P E A V X.

Et seéllees du grand seau de cire jaune sur double queue.

Et à costé est escript.

Leuës publiées, & enregistrées, present & requérant le Procureur general du Roy, pour estre ga dées & obseruées, selon leur forme & teneur, & extraits seront expediez audit Procureur general du Roy, suyuant l'Arrest ce iourd'huy prononcé. Fait à Aix en Parlement, le cinquiesme Mars mil six cens vingt,

signé, ESTIENNE.

TENEVR DE L'ARREST.

LA Cour ordonne que sur le reply desdictes Lettres Patentes, sera mis qu'elles ont esté leuës & publiées present & requerant le Procureur general du Roy, & seront enregistrées ez Registres d'icelle, pour estre gardées & obseruées, selon leur forme & teneur. Et expedier extraicts deuëment collationné audit Procureur general, pour enuoyer à chascun des Sieges de ce Ressort, pour y estre semblablement leuës publiées, enregistrées, gardées & obseruées. Et seront neantmoins leuës & proclamées à son de trompe & cry public, par tous les lieux & carrefours de ceste ville d'Aix, & autres villes & lieux ou besoin sera, afin que nul n'en pretende cause d'ignorance. Faict à Aix en Parlement, le cinquiesme Mars mil six cens vingt.

Collation est faicte.

signé, ESTIENNE,